


## Specijalna i zatvorska policija pretresli prostorije i zatvorenike KPZ-a Sarajevo



Pripadnici Specijalne jedinice MUP-a KS-a jutros su skupa sa pripadnicima zatvorske policije Kazneno-popravnog zavoda u Sarajevu, ukupno njih 40, pretresli centralni objekat u Sarajevu i objekt na Igmanu. Prema riječima Faruka Zubčevića, direktora KPZ-a Sarajevo u pretresu je učestvovalo i pet službenih pasa.

– Sukladno strategiji borbe protiv korupcije za period 2019./20. godinu KPZ Sarajevo je sačinio akcioni plan za njenu provedbu tako da je ustanovljen, konstatovan i na drugi način prezentiran cjelokupni pretres objekata.

Prilikom pretresa nije pronađeno ništa od nedozvoljenih supstanci i predmeta, Dakle, zatvor je potpuno čist, kaže za Oslobođenje Zubčević.

Pojašnjava da se u KPZ-u Sarajevu pretresi vrše na sedmičnom nivou i da se pretresaju po dvije prostorije.

– Ovo je bio generalni pretres kompletnog objekata gdje su se pretresali i prostorije straže, kantine, kao i prostorije za fizičke aktivnosti uključujući i direktorovu kancelariju. Cijlj pretresa je bio provjera učinka visokosofisticirane opreme kojom raspolaže KPZ a koja je ranije nabavljena. Naime, radi se o određenim detektorima za pronalazak predmeta od raznih metala, preciznih dubinskih visokosofisticiranih kamera i drugih uređaja koji je ova Urava KPZ-a nabavila i koji je locirala u ovom objektu, a imajući u vidu da je u toku certificiranje ovog zatvora prema ISO standardima u smislu sigurnosti podataka koje se sukladno zakonskoj regulativi obrađuju u zatvoru. Ovo će biti prvi zatvor na Balkanu koji će imati ISO standarde sigurnosti informacijama sa 114 kontrola. To će u svakom slučaju značiti i omogućiti primjenu zakona o zaštiti tajnih podata BiH. Konkretno, međunarodni sistem sigurnosti informacija ISO 270001-2013 čiji je primarni cilj informacijsko-tehnička zaštita. Tako da se njime u potpunosti provodi i kontroliše svaka djetatnost u smislu

kriterija tajnosti efikasnosti i efektivnosti, naglašava Zubčević.

Podsjetimo da je slučaj bjekstva Amela Sejfovića iz prostorija KPZ-a pokazao svu manjkavost dotadašnjeg načina rada, te da su korjenite promjene, koje su nastale dolaskom Zubčevića na čelo KPZ, uveliko promijenile stanje u ovoj instituciji.

Date: 14-08-2019